

S-DU PAO-LO SIA PEH FI-LIH-PI NYING GO SHŪ-SING. 使徒保罗写腓立比人个书信

Fl. I.

YLÆ-SU Kyi-toh-go nu-boh, Pao-lo teng Di-mo-t'a, *mông-mông* Fi-lih-pi dzæ-ü Kyi-toh Yiæ-su go cong sing-du, lin keh-sing kyin-toh teng bæen-z-go: ² Dæn-nyün Jing-ming ah-lah T'in-Vu, teng Cü Yiæ-su Kyi-toh, s-lôh eng-we bing-en peh ng-lah.

耶稣基督个奴仆，保罗等提摩太，望望腓立比在于基督耶稣个众圣徒，连箇星监督等办事个。²但愿神明阿拉天父，等主耶稣基督，赐落恩惠平安拨尔拉。

³ NGÔ me-me ts'eng-tao ng-lah ziu zia-zia ngô-go *Jing-ming*, ⁴ me-djông tao-kao z-'eo hwun-hwun-hyi-hyi t'i ng-lah cong-nying gyiu-gyiu, ⁵ we-leh ng-lah dzong deo-ih-nyih ih-dzih tao næn-kæn teng djün foh-ing z-ken dô-kô yiu-veng: ⁶ ing-we ngô k'ao-jih siang-sing, keh-we læ ng-lah sing li-hyang yiu ih-yiang hao z-ken tso ky'i-deo go Cü-kwu ih-dzih tao Yiæ-su Kyi-toh-go nyih-ts pih-ding we dzing-kong. ⁷ Ngô yia ing-kæ we-leh ng-lah cong-nying ka ts'eng; ing-we ^[1]ngô ts'ih-ts'ih-dzæ-sing kyih-teh ng-lah, feh-leng ngô be lin-diao so-djü, feh-leng ngô bin-leng k'ao-jih foh-ing, ^[2]tu z teng ngô dong hyiang keh-go eng-we. ⁸ Jing-ming hao teng ngô tso te-tsing, ngô dzæ-ü Yiæ-su Kyi-toh-go sing-dziang dza læ-tih ky'i-mo ng-lah cong-nying.

³ 我每每忖到尔拉就谢谢我个神明，⁴ 每常祷告时候欢欢喜喜替尔拉众人求，⁵ 为了尔拉从头一日一直到难间等传福音事干大家有份。⁶ 因为我靠实相信，箇位来尔拉心里向有一样好事干做起头个主顾一直到耶稣基督个日子必定会成功。⁷ 我也应该为了尔拉众人介忖；因为我切切在心记得尔拉^[1]，弗论我被链条锁住，弗论我辩论靠实福音，都是等我同享箇个恩惠^[2]。⁸ 神明好等我做对证，我在于耶稣基督个心肠咋来的企慕尔拉众人。

[1] *Yiu-teh fæn*, ng-lah ts'ih-ts'ih-dzæ-sing kyih-teh ngô. 有得翻，尔拉切切在心记得我。（原注）

[2] 'Ôh wô, tu z dong hyiang ngô-go eng-we. 或话，都是同享我个恩惠。（原注）

⁹ Ngô sô gyiu *Jing-ming*, z iao ng-lah-go jing-æ yüih-fah to-ky'i-læ, yiu ts'ong-ming-cü-we teng ih-ts'ih-go kyin-sih; ¹⁰ s-teh ng-lah we ^[1]bin-pih hao-tæ, yi we tso-nying ts'ing-kyih m-kwæn-ngæ ih-dzih tao Kyi-toh-go nyih-ts; ¹¹ yiu keh-sing k'ao-djôh Yiæ-su Kyi-toh ka læ kong-yi-go ko-ts we kyih-leh meo-zing, hao kwe yüong-wô tsæn-me peh Jing-ming.

⁹ 我所求神明，是要尔拉个仁爱越发多起来，有聪明智慧等一切个见识；¹⁰ 使得尔拉会辨别好歹^[1]，又会做人清洁呢关碍一直到基督个日子；¹¹ 有箇星靠着耶稣基督介来公义个果子会结勒茂盛，好归荣华赞美拨神明。

[1] *Yiu-teh fæn*, we ts'ing-tsæn hao z-ken. 有得翻，会称赞好事干。（原注）

¹² HYÜONG-DI, ngô iao ng-lah hyiao-teh ngô sô p'ong-djôh-go z-ken fæn-cün s-teh foh-ing we yü-kô hying-wông: ¹³ z-ka, ^[1]ngô-go lin-diao dzæ-ü Kyi-toh yi-kying ming-ming hyin-c'ih peh mun ^[2]dziao-ding-zông teng yü-to-go cong-nying tu teh-cü; ¹⁴ wa-yiu keh-sing hyüong-di yiu ih-do-pun, we-leh ngô-go lin-diao dzæ-ü Cü sing-li kyin-kwu, we yü-kô fông-tæn kông dao-li, ih-ngæn feh p'ô.

¹² 兄弟，我要尔拉晓得我所碰着个事干反转使得福音会愈加兴旺。¹³ 是介，我个链条在于基督^[1]已经明明显出拨满朝廷上^[2]等余多个众人都得知；¹⁴ 还有箇星兄弟有一大半，为了我个链条在于主心里坚固，会愈加放胆讲道理，一眼弗怕。

[1] 'Ôh wô, ngô we-leh Kyi-toh so-djü-tong. 或话，我为了基督锁住东。（原注）

[2] 'Ôh wô, tsiang-kyüing-go kong-kwun-li. 或话，将军个公馆里。（原注）

¹⁵ Næn-kæn djün Kyi-toh, yiu-sing z yiu ky'i-feh-ko tsang-teo-go sing, yiu-sing z yiu hao i-s *djün-go*. ¹⁶ Keh-sing kæn-kyi-go djün Kyi-toh, feh-z yiu ts'ing-kyih-go i-s, z iao kô-ts'eo ngô so-tong-go kw'u-næn: ¹⁷ keh-sing yiu jing-æ go, z hyiao-teh ngô we-leh bin-leng foh-ing shih-lih-tong. ¹⁸ Keh z dza ni? feh-leng dza-go, wa-z tsing-sing kô-sing, z yiu Kyi-toh djün-k'æ; keh z ngô hwun-hyi, yia cong-ü hwun-hyi-go. ¹⁹ Ng yia hyiao-teh, we-leh ng-lah-go tao-kao, teng Yiæ-su Kyi-toh-go *Sing-Ling* pông-dzu ngô, keh-go z-ken tsiang-læ ü ngô yiu kyi-sing; ²⁰ tsiao ngô ken-sing sô ky'i-mo sô siang-vông-go, ziu-z ngô ih-ngæn feh we wông-k'ong, fæn-cün tsah-tsah-ngang-ngang, feh-leng weh, feh-leng si, Kyi-toh læ ngô-go sing-zông dzing-gyiu tsiao-djông we teh-djôh tseng-kying.

¹⁵ 难间传基督，有星是有气弗过争斗个心，有星是有好意思传个。¹⁶ 箇星奸计个传基督，弗是有清洁个意思，是要加凑我锁东个苦难。¹⁷ 箇星有仁爱个，是晓得我为了辩论福音设立东。¹⁸ 箇是咋呢？弗论咋个，还是真心假心，

是有基督传开；箇是我欢喜，也终于欢喜个。¹⁹ 尔也晓得，为了尔拉个祷告，等耶稣基督个圣灵帮助我，箇个事干将来于我有救星；²⁰ 照我甘心所企慕所指望个，就是我一眼弗会惶恐，反转扎扎硬硬，弗论活，弗论死，基督来我个身上仍旧照常会得着尊敬。

²¹ Kông-tao ngô-zì, weh ziu-z Kyi-toh, si z-go hao-c'ü. ²² Ziah-z læ nyüoh-sing li-hyang weh-tong ngô kong-fu yiu dao-dzing, ka-ni ngô feh hyiao-teh hao kæn 'ah-li ih-yiang. ²³ Ngô sing-kwô-liang-dziang, sing-siang iao ky'ü-shü, hao teng Kyi-toh dô-kô læ-kæn; *keh z veng-nga yü-kô hao*: ²⁴ dæn-z ngô læ nyüoh-sing li-hyang læ-tong, ü ng-lah z keng-kô iao-kying. ²⁵ Keh kyi-jün z ngô toh-jih siang-sing-go, ngô hyiao-teh tsong we læ-tong, teng ng-lah cong-nying dô-kô læ-tong, hao peh ng-lah siang-sing-go sing we yü-kô tsing-ih, kô-ts'eo kw'a-lôh; ²⁶ s-teh ngô tsæ tao ng-go u-sen læ, ng-lah we-leh ngô hao dzæ-ü Kyi-toh Yiæ-su yüih-fah kao-hying-ky'i-læ.

²¹ 讲到我自，活就是基督，死是个好处。²² 若是来肉身里向活东我工夫有陶成，介呢我弗晓得好拣何里一样。²³ 我心挂两肠，心想要去世，好等基督大家来间；箇是分外愈加好。²⁴ 但是我来肉身里向来东，于尔拉是更加要紧。²⁵ 箇既然是我笃实相信个，我晓得总会来东，等尔拉众人大家来东，好拨尔拉相信个心会愈加进益，加凑快乐；²⁶ 使得我再到尔个乌碎来，尔拉为了我好在于基督耶稣越发高兴起来。

²⁷ Tsih iao ng-lah tso-nying-go 'ang-we teng Kyi-toh-go foh-ing siang-p'e: s-teh ngô, 'ôh-tsia læ k'en ng-lah, 'ôh-tsia læ bih-c'ü t'ing-meng ng-lah-go fong-sing, z yiu tso-yiang sing-siang lih-leh-lao, we-leh sô siang-sing-go foh-ing dong-sing-yiah-lih tso z-ken, ²⁸ ih-ngæn m-neh we-leh keh-sing dziu-dih *sing-li* ky'ih-hoh: keh z gyi-lah iao mih-vông, ng-lah iao teh-kyiu, ming-tông-tông-go bing-kyü; keh-go *bing-kyü* yia z c'ih-ü Jing-ming. ²⁹ Ing-we ng-lah yi-kying yiu keh-go eng-we teh-djôh-de, hao we-leh Kyi-toh feh tæ-n-tsih siang-sing Gyi, yia hao we-leh Gyi — ziu næn: ³⁰ z-ka, ng-lah næn-kæn yia læ-kæn tang ih-dzing, ziang ng dzong-zin k'en-kyin ngô, yin-dzæ t'ing-meng ngô ih-yiang-go.

²⁷ 只要尔拉做人个行为等基督个福音相配。使得我，或者来看尔拉，或者来别处听闻尔拉个风声，是有做样心想立勒牢，为了所相信个福音同心协力做事干，²⁸ 一眼晓得为了箇星仇敌心里吃惟。箇是其拉要灭亡，尔拉要得救，明当当个凭据；箇个凭据也是出于神明。²⁹ 因为尔拉已经有箇个恩惠得着了，好为了基督弗单只相信其，也好为了其——受难。³⁰ 是介，尔拉难间也来间打一阵，像尔从前看见我，现在听闻我一样个。

Fl. II.

KA-NI, ziah yiu soh-go dzæ-ü Kyi-toh go ky'ün-hwô shih-wô, soh-go jing-æ-go en-ŵe, soh-go *Sing-Ling-go* siang-t'ong, soh-go dz-pe æ-lin-go sing-dziang, ² ng-lah hao dzeng tso-yiang sing-siang, tso-yiang jing-æ, dô-kô 'eh-sing-'eh-i, s-teh ngô-go kw'a-lôh hao mun-tsoh. ³ Ih-ngæn m-nao dzeng tsang-teo-go sing, ih-ngæn m-nao siang hyü-hwô-go yüong-wô; z iao ti-sing-siao-i t'e-tseng bih-nying pi zi wa hao. ⁴ M-nao kôh-nying kwun zi, kôh-nying yia iao *kwu-djôh* nying-kô-go z-ken.

介呢，若有啥个在于基督个劝化说话，啥个仁爱个安慰，啥个圣灵个相通，啥个慈悲哀怜个心肠，² 尔拉好存做样心想，做样仁爱，大家合心合意，使得我个快乐好满足。³ 一眼睇得好存争斗个心，一眼睇得好想虚花个荣华；是要低声小意推尊别人比自还好。⁴ 睇得好各人管自，各人也要顾着人家个事干。

⁵ Ng-lah sing-li iao dzeng Kyi-toh Yiæ-su-go sing-siang: ⁶ Gyi peng-læ yiu Jing-ming-go siang-mao, ziu-z iao teng Jing-ming ih-yiang-go Gyi yia feh sön z mao-c'ong; ⁷ Gyi wa we ky'i-diao Zi-go yüong-wô, dzing-leh nu-boh-go siang-mao [1]læ tso-nying: ⁸ kyî-jün yiu-leh nying-go siang-mao, yi we kông-lôh-ky'i, pah-i-pah-jing zing-ts-ü si, ping-ts'ia jih-z-kô-zông ka si. ⁹ Sô-yi Jing-ming kao-kao kyü Gyi zông, s-peh Gyi ih-go ming-deo wa tseng-jü væn-pah-go ming-deo: ¹⁰ s-teh læ t'in-zông di-'ô lin di-ti-'ô go, væn-pah kyiah-k'o-deo tu we dzæ-ü Yiæ-su-go ming-deo ka gyü-lôh, ¹¹ væn-pah zih-deo tu we tsiao-jing Yiæ-su Kyi-toh z Cü, [K'en Y. 45. 23.] hao kwe yüong-wô peh T'in-Vu Jing-ming.

⁵ 尔拉心里要存基督耶稣个心想。⁶ 其本来有神明个相貌，就是要等神明一样个其也弗算是冒充；⁷ 其还会弃掉自个荣华，成了奴仆个相貌来做人^[1]。⁸ 既然有了人个相貌，又会降落去，百依百顺甚至于死，并且十字架上介死。⁹ 所以神明高高举其上，赐拨其一个名头还尊如凡百个名头。¹⁰ 使得来天上地下连地底下个，凡百脚骹头都会在于耶稣个名头介跪落，¹¹ 凡百舌头都会招认耶稣基督是主，[看 Y. 45. 23.] 好归荣华拨天父神明。

[1] *Peng-ven*, dzing-leh nying-go siang-mao. 本文，成了人个相貌。（原注）

¹² Ka-ni, ngô ts'ing-æ-go *hyüong-di*, ng-lah kyî-jün we djông-djông i-dzong ngô, (fi-dæn ngô læ-tong z-'eo, ziu-z yin-dzæ ngô feh læ-tong yia yü-kô we i-dzong,) iao dzeng kying-jing teng p'ô-gyü-go sing ky'i tso-dzing ng-go kyi-fah: ¹³ ing-we ng-lah 'ôh-tsia iao-siang tso, 'ôh-tsia neng-keo tso, tu z Jing-ming læ ng-lah sing li-hyang hyin-c'ih neng-ken, iao dzing-dziu Gyi sô hwun-hyi-go ts-i. ¹⁴ Ng-lah

tso væn-pah z-ken m-nao ün-'eng, m-nao tsang-leng: 15, ¹⁶ s-teh ng-lah læ wǎng-pang-hyüing-liu-go shü-dæ cong-nyiang hao tso ^[1]lao-jih, m-mao-bing, Jing-ming m-p'i-bing-go ng-nô; ng-lah hyin-c'ih weh-ming-go dao-li, ziang shü-kæn-zông liang-kwông ka ^[2]læ-tih tsiao-djôh gyi-lah: s-teh ngô tao Kyi-toh-go nyih-ts hao kao-hying, ing-we ngô m̃-teh tseo k'ong-deo lu, m̃-teh tso k'ong-deo kong-fu.

¹² 介呢，我亲爱个兄弟，尔拉既然会常常依从我，（非但我来东时候，就是现在我弗来东也愈加会依从，）要存谨慎等怕惧个心去做成尔个救法。¹³ 因为尔拉或者要想做，或者能够做，都是神明来尔拉心里向显出能干，要成就其所欢喜个旨意。¹⁴ 尔拉做凡百事干旣得好怨恨，旣得好争论。15, ¹⁶ 使得尔拉来横绷勋流个世代中央好做老实^[1]，旣毛病，神明旣批评个儿囡；尔拉显出活命个道理，像世间上亮光介来的照着^[2]其拉。使得我到基督个日子好高兴，因为我旣得走空头路，旣得做空头工夫。

[1] 'Ôh wô, ts'ing-kyih. 或话，清洁。（原注）

[2] 'Ôh wô, yüong tsiao-djôh. 或话，用照着。（原注）

¹⁷ Ng-lah siang-sing-go sing tông tsi-veh vong-z *Jing-ming*, ngô-go hyüih ziu-z iao *liu-c'ih-læ*, ziang din-tsiu ka, kwun læ gyi zông-deo, ngô z hwun-hyi, yia teng ng-lah cong-nying dô-kô hwun-hyi. ¹⁸ *We-leh* keh-go z-ken ng-lah yia kæ hwun-hyi, yia kæ teng ngô dô-kô hwun-hyi.

¹⁷ 尔拉相信个心当祭物奉侍神明，我个血就是要流出来，像奠酒介，灌来其上头，我是欢喜，也等尔拉众人大家欢喜。¹⁸ 为了箇个事干尔拉也该欢喜，也该等我大家欢喜。

¹⁹ DÆN-Z ngô dzæ-ü Cü Yiæ-su siang-vông soh-tsih ziu ts'a Di-mo-t'a tao ng-lah u-sen læ, s-teh ngô teh-cü ng-lah-go z-ken hao kw'un-sing. ²⁰ *Djü gyi ts-nga* ngô m̃-teh bih-nying *teng* ngô tso sing-siang, we tsing-sing kwô-nyiaen ng-lah-go z-ken: ²¹ tu z læ-tih tang-sön zi-go z-ken, feh *kwun* Kyi-toh Yiæ-su-go z-ken. ²² Ng-lah hyiao-teh gyi z s-c'ih-liao-go, z ziang ng-ts teng ah-tia ka, tso ngô-go dong-z-nying dô-kô djün foh-ing. ²³ Keh-lah ngô teh-cü zi-go z-ken z dza-go, sing-siang lih-k'eh ts'a gyi læ. ³⁴ Ping-ts'ia ngô dzæ-ü Cü jih-we siang-sing ngô-zi yia ziu læ-gyi.

¹⁹ 但是我在于主耶稣想望速即就差提摩太到尔拉乌碎来，使得我得知尔拉个事干好宽心。²⁰ 除其之外我旣得别人等我做心想，会真心挂念尔拉个事干。²¹ 都是来的打算自个事干，弗管基督耶稣个事干。²² 尔拉晓得其是试出了个，是像儿子等阿爹介，做我个同事人大家传福音。²³ 箇拉我得知自个事干是咋个，心想立刻差其来。²⁴ 并且我在于主实惠相信我自也就来其。

²⁵ Ngô ts'eng pih iao ts'a Yi-pô-feh-di tao ng-lah u-sen læ: gyi z ngô-go hyüong-di, ngô-go pông-siu, dong-de tông-ping, yia tso ng-lah-go ts'a-s, yi kong-ing ngô ky'üih-siao-dziang-tön. ²⁶ Ngô sô-yi z-ka ts'a gyi, ing-we gyi z ky'i-mo ng-lah cong-nying, do-nyiang zeo-meng, ing-we ng-lah t'ing-meng gyi yiu bing. ²⁷ Gyi z sang bing, ts'ô-ih-ngæn si: tsih-yiu Jing-ming æ-lin gyi; feh tæ-n-tsih æ-lin gyi, yia æ-lin ngô, sæn-leh ngô iu-zông kô iu. ¹⁸ Ngô sô-yi yü-kô zông-kying ts'a gyi læ, s-teh ng-lah k'en-kyin gyi yi we hwun-hyi, ngô-go iu-meng yia we ts'ô-tin. ²⁹ Ka-ni, ng-lah dzæ-ü Cü kæ hwun-hwun-hyi-hyi tsih-ziu gyi; ping-ts'ia yüong kying-djong keh-cong-ka nying: ³⁰ gyi we-leh tso Kyi-toh-go z-ken z ts'ô-ih-ngæn si, lin zi-go sing-ming tu feh kwu-djôh, iao pu-tsoh ng-lah kong-ing ngô go feh-tao-ts-c'ü.

²⁵ 我忖必要差以巴弗提到尔拉乌碎来。其是我个兄弟，我个帮手，同队当兵，也做尔拉个差使，又供应我缺少长短。²⁶ 我所以是介差其，因为其是企慕尔拉众人，大样愁闷，因为尔拉听闻其有病。²⁷ 其是生病，差一眼死。只有神明哀怜其；弗单只哀怜其，也哀怜我，省勒我忧上加忧。²⁸ 我所以愈加上紧差其来，使得尔拉看见其又会欢喜，我个忧闷也会瘥点。²⁹ 介呢，尔拉在于主该欢欢喜喜接受其；并且用敬重箇种介人。³⁰ 其为了做基督个事于是差一眼死，连自个性命都弗顾着，要补足尔拉供应我个弗到之处。

Fl. III.

TSONG-R-YIN-TS, ngô-go hyüong-di, ng-lah dzæ-ü Cü yüong kw'a-lôh. Ngô sia tso-yiang shih-wô peh ng-lah, dzæ ngô m-kao in-væn, ü ng-lah z wëng-tông. ² Yüong kwu-djôh keh-sing ôh-keo, kwu-djôh keh-sing tso fi-li z-ken go, kwu-djôh keh-sing keh-diao bi-nyüoh go. ³ Ah-lah k'ao-djôh Sing-Ling voh-z Jing-ming, dzæ-ü Kyi-toh Yiæ-su kw'ô-k'eo, ih-ngæn feh dzæ-ü nyüoh-sing fông-tæn, tsing z tsiu-keh-li go.

总而言之，我个兄弟，尔拉在于主用快乐。我写做样说话拨尔拉，在我旤告厌烦，于尔拉是稳当。² 用顾着箇星恶狗，顾着箇星做非礼事干个，顾着箇星割掉皮肉个。³ 阿拉靠着圣灵服侍神明，在于基督耶稣夸口，一眼弗在于肉身放胆，正是周割礼个。

⁴ Ngô feh-jün hao dzæ-ü nyüoh-sing fông-tæn. Ziah-z bih-nying ts'eng k'o-yi dzæ-ü nyüoh-sing fông-tæn, ngô z yü-kô k'o-yi-go: ⁵ ngô di-pah nyih ziu tsiu-keh-li, z Yi-seh-lih-go dzoh-veng, Bin-yüô-ming-go ts-p'a, shü-dæ z-go Hyi-pah-læ nying;

kông-tao lih-fah, z Fah-li-sæ nying; ⁶ kông-tao nyih-sing, z pih-næn kyiao-we go; kông-tao lih-fah-go kong-yi, m-kao hao p'i-bing.

⁴ 我弗然好在于肉身放胆。若是别人忖可以在于肉身放胆，我是愈加可以个。⁵ 我第八日受周割礼，是以色列个族份，便雅悯个支派，世代是个希伯来人；讲到律法，是法利赛人；⁶ 讲到热心，是逼难教会个；讲到律法个公义，哋告好批评。

⁷ Dæn-z keh-sing z-ken dzong-zin z ngô-go dzæn-deo, ngô we-leh Kyi-toh yi-kying sön gyi z zih-peng. ⁸ Hwông-ts'ia keh-sing ih-ts'ih-go z-ken ngô yin-dzæ yia sön z zih-peng, we-leh sih-teh ngô-go Cü Kyi-toh Yiæ-su, keh ting iao-kying-go cü-sih; ngô we-leh Kyi-toh yi-kying zih-diao væn-pah z-ken, yia k'en gyi ziang leh-seh ka, s-teh ngô hao dzæn-tsing Kyi-toh, ⁹ yi hao peh ngô sön z dzæ-ü Gyi, feh-z yiu dzong lih-fah ka læ ngô-zi-go kong-yi, z yiu keh we-leh siang-sing Kyi-toh ka læ-go kong-yi, z dzong Jing-ming ka læ, s-peh siang-sing cü-kwu go: ¹⁰ s-teh ngô hao hyiao-teh Gyi, teng Gyi weh-cün-læ-go neng-ken, yi hao teng Gyi-go kw'u-næn dô-kô yiu-veng, z teng Gyi-go si-fah tso-leh ih-yiang siang-mao; ¹¹ 'ôh-tsia hao ken-tao si-nying weh-cün-læ go di-bu.

⁷ 但是箇星事干从前是我个赚头，我为了基督已经算其是蚀本。⁸ 况且箇星一切个事干我现在也算是蚀本，为了识得我个主基督耶稣，箇顶要紧个知识；我为了基督已经蚀掉凡百事干，也看其像垃圾介，使得我好赚进基督，⁹ 又好拨我算是在于其，弗是有从律法介来我自个公义，是有箇为了相信基督介来个公义，是从神明介来，赐拨相信主顾个。¹⁰ 使得我好晓得其，等其活转来个能干，又好等其个苦难大家有份，是等其个死法做了一样相貌；¹¹ 或者好赶到死人活转来个地步。

¹² Bing feh-z ngô yi-kying teh-djôh-de, yia bing feh-z ngô yi-kying djün-be-de: tsih-yiu ngô wa læ-tih tse-zông-ky'i, 'ôh-tsia hao ken-djôh; we-leh ka ngô-zi yia yi-kying peh Kyi-toh Yiæ-su ken-djôh-de. ¹³ Hyüong-di, ngô-zi feh sön z yi-kying ken-djôh-de: tæ'n tso keh ih-yiang, ziu-z feh ky'i kwu pe-'eo-go z-ken, ts'iang-ts'iang zông-zin tse-gyiu min-zin-go z-ken, ¹⁴ ih-dzih ken tao piao-deo di-fông, iao-siang teh-djôh Jing-ming dzæ-ü Kyi-toh Yiæ-su t'in-zông dziao-læ-go eng-sông.

¹² 并弗是我已经得着了，也并弗是我已经全备了。只有我还来的追上去，或者好赶着；为了介我自也已经拨基督耶稣赶着了。¹³ 兄弟，我自弗算是已经赶着了。单做箇一样，就是弗去顾背后个事干，抢抢上前追求面前个事干，¹⁴ 一直赶到标头地方，要想得着神明在于基督耶稣天上召来个恩赏。

¹⁵ Ka-ni, ah-lah væn-pah djün-be-go cü-kwu tu kæ dzeng keh-go sing-siang: jü-ko ng-lah yiu soh-go bih-yiang sing-siang, keh-go z-ken Jing-ming tsiang-læ yia we hyin-c'ih peh ng-lah. ¹⁶ Dæn-z ah-lah sô yi-kying tso-tao-go di-bu, kæ i-dzong tso-yiang fah-tseh, kæ dzeng tso-yiang sing-siang.

¹⁵ 介呢，阿拉凡百全备个主顾都该存箇个心想。如果尔拉有啥个别样心想，箇个事干神明将来也会显出拨尔拉。¹⁶ 但是阿拉所已经做到个地步，该依从做样法则，该存做样心想。

¹⁷ Hyüong-di, ng-lah yüong dô-kô 'ôh ngô-go yiang, ping-ts'ia yüong k'en keh-sing tsiao ah-lah-go pông-yiang ka tso-go. ¹⁸ (Ing-we yiu hyü-to nying sô tso-go, z ngô le-ts' teng ng-lah wô-ko, yin-dzæ 'en-leh ngæn-li tsæ wô-go, *gyi-lah* z Kyi-toh jih-z-kô-go dziu-dih: ¹⁹ gyi-go kwe-keng z iao mih-diao; gyi-go jing-ming z zi-go du-bi, we pô zi-go tao-me z-ken sön z yüong-wô; z liu-sing shü-kæn-zông z-t'i go.) ²⁰ Ah-lah-go peng-koh z læ t'in-zông; ah-lah yia tæ-n-teng Kyiu-cü, *ziu-z* Cü Yiæ-su Kyi-toh, dzong t'in-li ka læ: ²¹ Gyi we yüong Gyi-zi cü-voh væn-veh go do neng-ken, pin-hwô ah-lah pe-zin-go kyi-sing, hao teng Gyi-zi yüong-wô-go kyi-sing tso-leh ih-yiang siang-mao.

¹⁷ 兄弟，尔拉用大家学我个样，并且用看箇星照阿拉个榜样介做个。¹⁸ （因为有许多人所做个，是我屡次等尔拉话过，现在含勒眼泪再话个，其拉是基督十字架个仇敌。¹⁹ 其个归根是要灭掉；其个神明是自个肚皮，会把自个倒霉事干算是荣华；是留心世间上事体个。）²⁰ 阿拉个本国是来天上；阿拉也单等救主，就是主耶稣基督，从天里介来。²¹ 其会用其自制服万物个大能干，变化阿拉卑贱个肌身，好等其自荣华个肌身做了一样相貌。

Fl. IV.

Ka-ni, ngô sô ts'ing-æ ky'i-mo-go hyüong-di, z ngô-go kw'a-lôh teng kwun-min, ngô ts'ing-æ-go, ng-lah dzæ-ü Cü kæ z-ka lih-leh-lao.

介呢，我所亲爱企慕个兄弟，是我个快乐等冠冕，我亲爱个，尔拉在于主该是介立勒牢。

² Ngô ky'ün Yiu-o-tia, yia ky'ün Jing-tu-kyi, yüong dzæ-ü Cü dzeng tso-yiang sing-siang. ³ Wa-yiu ts'ing ng, jih-we-go te-siu, pông-dzu keh liang-go nyü-nying;

gyi-lah z teng ngô dô-kô c'ih-lih djün foh-ing go; Keh-li-min yia z-ka, wa-yiu ngô yü-to-go pông-siu, gyi-lah ming-z tu sia læ weh-ming shü-li go.

² 我劝友阿爹，也劝循都基，用在于主存做样心想。³ 还有请尔，实惠个对手，帮助箇两个女人；其拉是等我大家出力传福音个；革利免也是介，还有我余多个帮手，其拉名字都写来活命书里个。

⁴ Ng-lah dzæ-ü Cü yüong dzing-t'ong kw'a-lôh: ngô yi wô, Yüong kw'a-lôh. ⁵ Ng-lah 'o-ky'i-go sing hao peh long-tsong nying hyiao-teh. Cü z gying-go. ⁶ Ih-ngæn m-nao zeo-meng; yiang-yiang yüong tao-kao, gyiu-k'eng, lin coh-zia shih-wô, peh Jing-ming hyiao-teh ng-lah-go sing-nyün: ⁷ z-ka, keh ts'eh-dôh-feh-tao Jing-ming-go bing-en, dzæ-ü Kyi-toh Yiæ-su, we pao-wu ng-lah-go sing teng nyiæn-deo.

⁴ 尔拉在于主用长通快乐。我又话，用快乐。⁵ 尔拉和气个心好拨拢总人晓得。主是近个。⁶ 一眼旣得好愁闷；样样用祷告，求悬，连祝谢说话，拨神明晓得尔拉个心愿。⁷ 是介，箇测度弗到神明个平安，在于基督耶稣，会保护尔拉个心等念头。

⁸ TSONG-R-YIN-TS, hyüong-di, væn-pah dzing-jih-go z-ken, ^[1]tön-tsing-go z-ken, kong-bing-go z-ken, ts'ing-kyih-go z-ken, k'o-æ-go z-ken, t'i-min-go z-ken, dza-go yiu teh-ky'i, dza-go yiu tsæn-me, keh-sing ng-lah tu yüong s-ts'eng. ⁹ Ng-lah læ ngô u-sen sô 'ôh-jih, sô tsih-ziu, sô t'ing-meng, sô k'en-kyin-go z-ken, tu yüong ky'i tso: keh bing-en-go Jing-ming ziu we teng ng-lah dô-kô læ-tong.

⁸ 总而言之，兄弟，凡百诚实个事干，端正个^[1]事干，公平个事干，清洁个事干，可爱个事干，体面个事干，咋个有德气，咋个有赞美，箇星尔拉都用思忖。⁹ 尔拉来我乌碎所学习，所接受，所听闻，所看见个事干，都用去做。箇平安个神明就会等尔拉大家来东。

[1] 'Ôh wô, kwe-kyü-go. 或话，规矩个。（原注）

¹⁰ Ngô dzæ-ü Cü do-nyiang hwun-hyi, ing-we ng-lah s-nyiæn ngô go sing-siang yi fah-c'ih-læ: ng-lah nyün-z *su-djông* yiu keh-go sing-siang, tsih-z p'ong-feh-djôh kyi-we. ¹¹ Ngô bing-fi we-leh ky'üih-siao-go yün-kwu ka kông: ing-we feh-leng soh-go z-ken tu cü-tsoh, keh z ngô yi-kying 'ôh-tao-de. ¹² Tso-nying bing-dzin, tso-nying fu-tsoh, ngô tu hyiao-teh-go; feh-leng soh-go *di-fông*, feh-leng soh-go z-ken, 'ôh-tsia ky'üoh-pao, 'ôh-tsia du-kyi, 'ôh-tsia yiu-yü, 'ôh-tsia feh tsoh, ngô tu 'ôh-jih-ko-de. ¹³ Z Kyi-toh kô ngô lih-liang, dzæ-ü Gyi ngô yiang-yiang z-ken tu neng-keo tso. ¹⁴ Se-tsih z-ka, ngô wæn-næn z-'eo ng-lah kong-ing ngô, yia z tso-leh hao-go.

¹⁰ 我在于主大样欢喜，因为尔拉思念我个心想又发出来。尔拉原是素常有箇个心想，只是碰弗着机会。¹¹ 我并非为了缺少个缘故介讲。因为弗论啥个事干都知足，箇是我已经学到了。¹² 做人贫贱，做人富足，我都晓得个；弗论啥个地方，弗论啥个事干，或者吃饱，或者肚饥，或者有余，或者弗足，我都学习过了。¹³ 是基督加我力量，在于其我样样事干都能够做。¹⁴ 虽即是介，我患难时候尔拉供应我，也是做勒好个。

¹⁵ Ng-lah Fi-lih-pi nying yia hyiao-teh, djün foh-ing ky'i-deo, ngô tseo-c'ih Mô-gyi-teng z-'eo, kông-tao do-c'ih siu-tsing-go z-ken, tsih-yiu ng-lah, m̃-teh bih-go kyiao-we, læ kong-ing ngô: ¹⁶ ziu-z ngô læ T'iah-sah-lo-nyi-kyüô z-'eo, ng-lah feh-ts ih-tsao, yiu liang-tsao, ts'a nying læ pu ngô ky'üih-siao. ¹⁷ Ngô bing feh-z siang ng-lah-go li-veh; tsih siang ko-ts to, hao kwe peh ng-lah-go ming-'ô. ¹⁸ Væn-pah tong-si ngô ts'iah-ts'iah yiu-yü; ngô dzong Yi-pô-feh-di tsih-ziu ng-lah-go li-veh, z Jing-ming sô tsih-ziu sô hwun-hyi p'eng-hyang-go tsi-veh, næn-kæn ngô sing tsoh-de. ¹⁹ Dæn-z ngô-go Jing-ming tsiao Gyi-zi yüong-wô-go fu-tsoh dzæ-ü Kyi-toh Yiæ-su we pu-tsoh ng-lah yang-yang ky'üih-siao-dziang-tön. ²⁰ Dæn-nyün yüong-wô tao shü-shü-dæ-dæ kwe peh Jing-ming ah-lah T'in-Vu. Üô-meng.

¹⁵ 尔拉腓立比人也晓得，传福音起头，我走出马其顿时候，讲到驮出收进个事干，只有尔拉，旣得别个教会，来供应我。¹⁶ 就是我来帖撒罗尼迦时候，尔拉弗止一遭，有两遭，差人来补我缺少。¹⁷ 我并非是想尔拉个礼物；只想果子多，好归拨尔拉个名下。¹⁸ 凡百东西我绰绰有余；我从以巴弗提接受尔拉个礼物，是神明所接受所欢喜喷香个祭物，难间我心足了。¹⁹ 但是我个神明照其自荣华个富足在于基督耶稣会补足尔拉样样缺少长短。²⁰ 但愿荣华到世代代归拨神明阿拉天父。亚们。

³¹ Keh-sing dzæ-ü Kyi-toh Yiæ-su ko-tang-ko sing-du, ng-lah tu yüong mông-mông gyi. Teng ngô dô-kô læ-tong keh-sing hyüong-di tu mông-mông ng-lah. ²² Cong sing-du iao mông-mông ng-lah: Kæ-sah keh-kô li-hyang go sing-du yü-kô iao mông-mông ng-lah.

²¹ 箇星在于基督耶稣个打个圣徒，尔拉都用望望其。等我大家来东箇星兄弟都望望尔拉。²² 众圣徒要望望尔拉。该撒箇家里向个圣徒愈加要望望尔拉。

²³ Dæn-nyün ah-lah Cü Yiæ-su Kyi-toh-go eng-we teng ng-lah cong-nying dô-kô læ-tong. Üô-meng.

²³ 但愿阿拉主耶稣基督个恩惠等尔拉众人大家来东。亚们。